

## ZAKILIXUT



### ganbaratik

✿ Xabier Lekuna

## Garantien izenean

► Hego Euskal Herriko kaleetan bideo-espioiak ezartzeak herritarrengan lasaitasuna sortuko duela iragarri dute polizia adituek, «garantia» izango baitira gehiegikeriak egin ez daitezkeen. Asmoa ez omen da, gainera, «kaleak bideoez betetzea», antza denez, lehendik ere nahikoak baitaude.

Ados nago Atutxarekin, bai. Bideoak neurri errepresiboa baino gehiago delituak ez gertatzeko dira. «Garantia» izan daitezkeen, susmoa eragiten duen pertsona, kale edota egoitza filmatu beharko lirateke. Eta garantia izateko, noski, epaileen esku utzi beharko lukete filmatutako guztia, etenik gabe. Beraz, egin dezagun susmagarrien zerrenda: Intxaurrendoko kuarteleko egoitzak; Atutxak eskatuko al dio Mayor Orejari guardia zibilek atxilotuei egin ohi dizkieten galdeketa grabatzeko eta epaileen esku uzteko? Ez noski. Hala ere, aukera ona du Galiziako hiru atxilotuen galdeketa grabatzeko. Modu ona litzateke tratatu txarrak salatzeke «agindua dutenei» argumentuak kentzeko, ezta?

Eta grabatzen hasiz gero, Arkauteko ziegetan bideo bat baino gehiago jartzea ez legoke soberan: Andoni Murelagari eta Juan Calvori egindakoek epaileen kondena eragin zutela ez dugu ahaztu behar; beraz, garantiaren izenean, bideoa.

Atutxak dienez, bideoek ez dituzte delituak eragotziko, ez dira horretarako. Euren helburua da irudiak gizarteratzea eta modan dagoen «alarma soziala» sortzea. Ondorioz, urteetako alarma deuseztu nahi badute, filma dezatela eta, bide batez, erakus dezatela komisarietan eta espetxetako ziegetan gertatzen dena. Batzuk lasaia ginateke. ►

# Gasteizko Asto Nagusia

► 'Txaspas'-ek marka guztiak hobetu zituen Blusen Eguneko lasterketa bizkorrean

Gasteizkoa ez da Aste Nagusia, ezta Frantziako Tourra ere, baina badu Aste Nagusia eta erlojupeko gogor bat, atzo goizean egin zen Blusen Eguneko Aste Lasterketaren 31. ekitaldian ikusi zen bezala.

Leblanc batek-edo azken urteotako ibilbidea —Andre Mari Zuriaren plazaren inguruko zirkuitu selektiboa— aldatu eta horren ordez errodadorentzako bat —Guardien plaza-tik zezenplazaraino— jarri zuen aurtengo. Alabaina, zorritzarreko itzuliren batean gertatu den bezala, euria agertu eta dena hankaz gora ipini zen: zaparradak gogor jo eta lasterketa aurreikusi baino apur bat lehenago abiatu zen, agian astoen jabeak euri-lainoak beldurrez ikusi zituelako. Ondorioa egokia izan zen garai olinpikootan, Silenciosos koadrilaren Txaspas zazpi minutu eskaseta helmugaratu baitzen eta errekorra ezarri.

Txinpartak taldearen Galindo astoa, berriz, dexente atzerago iritsi zen, Txirritaren Atutxa Bideo Jubenil-ekin batera; Roldan, Cuenda eta abarrek hezurak busti baino ez zuten egin. Hori bai, onura gehien atera zuena Amaritako (Araba) abeltzaina izan zen, ziztu biziko karrera baten truke asto bakoitzeko ia 10.000 pezeta jaso baitzituen (guztira 15 aritu ziren). Ederra kontua!

### Kazetariak eta bigantxak

Aitzin-etapa bukatuta, ordea, onena etorri zen, betiko moduan: kazetariok mokoka hasi irabazlearen adierazpen eskusiboenak edo stein-man orjinalena lortu nahia... «Asto ona, ezta?», galdetu eta irabazleak zera erantzun: «Ona? Ez dakit, eman didatena». Bien bitartean, telebista lokaleko profesional batek mikrofonoa eskuan hartu eta astoaren gainetik bertatik irudi kixotesko batzuk grabatu euri-jasa jasanezina zelarik! Bestalde, hara non lokala ez den telebista kateko bat irabazleari galdera ezohi-



Blusen Eguneko jaiaren hasiera aldrebesa gertatu zen, baina gero hobera jo zuen arratsalde hasiera arte

koak egiten saiatu eta Arabatik kanpokoak ez ote den galdetu zion. «Ez naiz izango, ba! Ea, oraintxe bertan amaitu da elkarrizketa!», esan zion blusak muturtu gabe. Beste medio batzuek, Egin-ekoek bezala, giza baliabideen despiegea hobetsi eta tarteko denborak hartzeko jendea sakabanatu zuten. Sariak emateko ekitaldia zetorren gero dozena pare bat lagun eta beste horrenbeste euritakoren artean, eta kazetarion gora-beherak ere tartean zirela.

Batek esan zezakeen orduan Gasteiz jaietan zegoela! Asto lasterketatik bigantxetara —eta arratsaldean zekorketara, nonbait ani-

malien eskubideen aldekoak pozarren uzteko eta festa animalien kontua dela frogatzeko—, baina plazan sartu orduko publikoa ez zen 50etik gora eta harean bizpahiru mukizu solasean ari ziren. Hala ere, 10:30ak aldera eguzkia aterata handik aurrera Gasteizko jai itxura distiratsu bilakatu zen (soilik arratsalde hasiera arte izan bazen ere). Baina orduko ikuskaria ere Aste Nagusikoa zen Aste Nagusi batekoa baino gehiago: 11:15ak zirela, zezenplazako presidentek lehen bigantxa irteteko keinua plastikozko poltsa zuri baten antzeko zerbaitez baliaturik egin zuen! Animalia, gainera, indarge zebilen, eta erasotzekorik topatzen ez zuen horretan, adar batekin burladeroa jo eta paraplejiko gertatu omen zen! Eskerrak bigarrena plazaratu zuten, baina alferrik, zaindariak atea oker ireki ondotik bigantxa kailejoian korrika hasi baitzen denon arriskurako! Jai hasiera aldrebesa, benetan.

Luis Karlos Garcia

GASTEIZ

Atutxa Bideo

Jubenil,  
Galindo,  
Cuenda eta  
gainontzekoek  
ez zuten ezer  
egiterik izan  
Txaspas asto  
indartsu eta  
bizkorrean  
aldean.

JOSEBA  
OLALDE